

20 boche et 40 guardie a le qual conveniva farli le spexe. À 'uto di la Signoria ducati 1000 per lettere di cambio in Pantaleo Coresi, qual laudò assai. *Item*, nel ritorno, è stato a la Vallona, e quel sanzacho era venuto di 4 zorni et lo honorò. E li si preparava fuste et 10 galie, e disse il sanzacho voleva ussir contra i nimici di la Signoria. A la Vajusa erano 20 galie. *Item*, com' el restava debitor esso orator di la Signoria per li danari ave di Achmat per li lavori etc. ducati 1891. Laudò sier Lunardo Bembo, qual è restato de li vice baylo, qual volea venir in questa terra, con il salario piacerà a la Signoria nostra di limitarli. *Item*, laudò sier Lunardo Zustignan di sier Francesco et Alberto Bavarin, che andono con lui per la recuperation di beni di merchadanti. *Item*, el Signor è livido, meninconico, à 6 fioli, come dirò; à intrada un milion et 800 milia ducati, qual li mete in spexa. *Item*, di charazari traze un milion et 200 milia ducati a l'anno. *Item*, ha in la Grecia cavali ..., à janizari 10000; à 100 capi di quelli, a li qual li dà provision, li qual non se incurà chi sarà Signor, pur che siano pagati. El primo fiol sta apresso il Charaman estranio; il 2.º a Amasia è valente; il 3.º a Nicomedia, qual sentò in locho dil padre; il 4.º morì etc. come più *diffuse* dirò qui di soto in una naration.

Qui soto sarà notado una nota di oficii turcheschi in questo tempo.

El Signor, nome sultan Baysit.

Achmat bassà } visieri, hanno aspri 1000 per uno
Mustafà bassà } al zorno, et da le ville altri aspri
Dauth bassà } 1000 per uno al zorno.

Agà di janizari à aspri 500 al dì, à soto de si giani-
zari 3000, et ha per uno aspri 5 al dì.

Quel bolla le lettere dil Signor, aspri 200 al dì.

Olachi 600, porta le scuffe longe, vanno inanzi dil
Signor, aspri 5 al dì.

Falconieri 100, aspri 5 al dì.

Quelli atende a sparvieri, aspri 5 al dì e sono 30.

Quelli atende ai lovi zirvieri, aspri 5 al dì, sono 6.

Item, à 600 cavalli in stalla che non si cavaleha, a
li qual li atende 300 homini con aspri 5 al dì.

Gambeli 3000, i qual è atesi da homeni 200, hanno
8 aspri al dì.

Mulli 600, i qual è governadi da homeni 300, hanno
8 aspri al dì.

El depentore dil Signor, el qual à aspri al dì 60.

Item, à fioli vivi 5 al presente.

Mostafà.

Mamuth.

Chorchut.

Alimach.

Selensia.

Item, à 1500 spachi zoè homeni d'arme, à aspri 20
al dì.

Quelli fanno le curazine n. 1500, hanno aspri 5
al dì.

Quelli drezano li pavioni, n. 600. 210

*Copia de una lettera dil Signor turcho, portata
a la Signoria nostra per Andrea Gritti ve-
nuto orator de li.*

Sultan Baiasit per la Dio gratia imperador de Asia et Europa etc., a lo illustrissimo et excellentissimo et honoratissimo doxe de la illustrissima Signoria di Venetia, domino Leonardo Lauredano, la degna et honorevole salutation mandemo con li soprascripti tituli. Al presente, per corroborar la pace et amicitia infra nui contracta, havete mandato al mio imperio el nobile et honorato vostro ambasciator domino Andrea Gritti, la qual pace et amicitia la mia imperial majestà ha acceptata et corroborata; et ancora ha referito quello che le signorie vostre hanno ordinato, a la mia imperial majestà, il che havemo ottimamente inteso, *maxime* circha i capitoli per avanti mandati a la vostra excellentia, nei quali se contineva: ch'el vostro baylo venisse qui et al fine de uno anno se havesse ad mutar et mandarne un altro; et sopra questo fono firmati i capitoli. Al presente, la vostra illustrissima Signoria ha dimandato che 'l vostro baylo possi venire et stare secondo la antiqua consuetudine; et però la mia imperial majestà ha acceptado la domanda de la vostra Signoria, et havemo comandato che 'l vostro baylo vengi et stagi tre anni, et passati i tre anni habia licentia de partirse, et che 'l venga un altro in suo loco. Un'altra domanda havete fato a la mia imperial majestà; che li homeni et merchadanti vengono nel mio imperio possino star secondo la usanza et antiqua consuetudine, la qual ancora havemo acceptado, con questo che ai homeni et merchadanti vostri vengono nel paese de l'imperio nostro ad mercadantare, infra termine de tre anni, niun per causa de carazo ge possi dar impedimento. Et lo ambascador vostro la ambassata et debito suo ben ha satisfato, et da la banda nostra verso de lui è stà fatto el conveniente; et cussi ho comandato et quello licentiat. Scripto ne la nostra imperial residentia, ne l'anno de lo advenimento de Christo 1503, in la città de Constantinopoli, a dì 6 de mese de Octobrio.